




ITA AGRADESE NA'I BA FIAR ne'ebé ITA SIMU

Durante fulan rua ne'e, ita hakarak prepara an ba konklusaun tinan 500 evanjelizasaun Timor nian. Iha fulan agustu sei taka selebrasaun sira ne'eb'e durante tinan ida ne'e parokia no Diozese sira hala'o. Tan ne'e, hamutuk oratorianu sira, iha fulan rua ne'e ita hakarak deskobre oinsá ita simu fiar no agrade-se Na'i tanba, liuhusi ema seluk no akontesimentu ruma, ita hotu bele hatene Nia no deskobre Ninia domin.

IKONE

Loron ida iha tinan 1828 (bainhira Joanzinho Bosco iha tinan 13 de'it) senhor Giuseppe Moglia, ne'ebé serbisu nu'udar agrikultór, fila husi toos kole liu, kosar been suli de'it no lori sasán todan iha ninia kbaas. Sinu Uma Kreda nian foin baku suku 12 no senhor deskansa iha rai no nia la hanoin atu reza Angelus hanesan bain-bain ema halo. Husi ninia fatin, nia haree Joanzinho Bosco iha escada leten ne'ebé hateke ba foho sira, parese hamanas an iha loron, hafoin nia hakne'ak no reza Angelus ho lian maka'as. Katuas ida ne'e goza Joanzinho: "Haree took, ami katuas sira tenke serbisu husi dader to'o kalan, to'o isin tomak moras, no ó, labarik, hateke tun-sae, la halo buat ida no hafoin reza!". Joanzinho kontinua nia orasaun to'o hotu, hodi la para maski katuas ne'e hasara nia, hafoin tun husi eskada no hakbesik katuas Giuseppe hodi dehan: "Senhor hatene katak ha'u la baruk atu serbisu, maibé ha'u-nia inan hanorin mai ha'u katak dala ruma ita presiza hateke ba buat ne'ebé hale'u ita, haree Maromak iha natureza no agrade-se Nia hodi reza. Se ita reza, husi fini rua ne'ebé ita kuda, ita sei hetan fulin 4, se ita la reza, husi fini 4 susar mós atu hetan fulin 2. Tansa senhor ohin la reza? Tansa sente susar atu husik sasán servisu nian ba minutu ruma no reza orasaun badak ida?"



Husi momentu ida ne'ebá, katuas nunka hala'o buat ne'ebé Joanzinho hanorin ba nia ho liafuan hirak ne'e.

Pergunta atu halo oratorianu sira reflète:

- ⇒ Iha pasajen ida ne'e ita haree katak fiar hanesan "moras" ida, presiza komunika husi ema ida ba ema seluk: ma-ma Margareta hanorin ba Joanzinho, no nia hato'o ninia hanoin ba katuas Giuseppe. Ita konxiente katak iha oratóriu, ita mós halo parte "korente" ne'ebé, husi tinan 1500 bainhira misionariu dahuluk sira lori fiar ba rai Timor, transmite fiar husi jersaun ba jersaun? Ha'u bele halo saida atu fiar sei habelar nafatin iha rai doben Timor?
- ⇒ Se mak hanorin mai ha'u atu fiar? Ha'u-nia família karik? Misionariu ruma? Ha'u koko hanoin fila fali ba ema sira ne'ebé tulun ha'u hatene kona-ba Maromak no ha'u agrade-se ba sira.



JOGU

Jogu ida ne'e hakarak tulun atu komprende katak fiar presiza sasin sira ne'ebé "pasa ba malu" rikusoin ne'ebé sira deskobre.

Prepara-saun: fahe oratorianu sira ba grupu, conforme oratorianu na'in hira partisipa. Ba grupu ida-idak presiza prepara kaixa ida nakonu ho pajina jornál sira nian ne'ebé hanehan hanesan bola. Hili tiha fraze ida badak husi Evanjellu (karik hili fraze husi evanjellu domingu nian, nuune'e fasil liu ba oratorianu sira atu tau hamutuk), hakerek fraze nia liafuan ida-idak iha billete ida hafoin kahur billete sira ne'e ho pajina jornál sira.

Grupusira sei hamriik iha kampu klaran hodi halo fileira; iha kampu nia sorin ida sei tau caixa ho surat-tahan, iha sorin seluk kadeira ka ai-kabelak ida iha ne'ebé oratorianu sira bele forma fali fraze.



Bainhira jogu hahú jogadór ida, husi grupu ida-idak, halai ba to'o iha grupu nia caixa hodi buka billete ida entre pajina jornal sira nian. Maski nia haree billete barak, nia bele foti ida de'it no halai lori ba ninia kolega ida ne'ebé, simu tiha billete ida ne'e, sei halai atu tau iha kadeira ka ai-kabelak leten. Hafoin nia fila ba grupu, nune'e nia kolega seluk bele halai atu foti billete ida tan husi caixa. Bainhira iha ona billete barak no jogadór sira hahú komprende fraze ne'ebé tenke forma, sira sei tau billete sira tuir malu didi'ak. Maski sira hatene ona fraze, tenke tau liafuan hotu, nune'e jogu sei kontinua to'o bainhira fraze sei kompleta.



SELEBRASAUN

Prepara fatin ho kruz ida no iha nia hun tau Evanjellu ka Biblia ida ho lilin rua. Dook uitoan, tau mapa ida Timor nian (ita sei halo prosisaun husi kruz ba to'o mapa)

G: Ohin ita halibur iha ne'e atu agradece Na'i ba prezente fiar nian ne'ebé ita simu husi ita-nia família no comunidade sira, maibé liuliu ba misionariu sira ne'ebé tinan 500 liu ba lori Jezús ba rai Timor.

Kantu entrada nian:

G: Ita hamriik iha kruz nia ohin, tanba la iha misaun se la iha Jezús nia domin, la iha deseju atu haklaken Evanjellu se seidauk hatene didi'ak Jezús. Misionariu dahuluk sira iha domin boot ba Maromak, tan ne'e sira sente katak la bele rai maksoin ba sira-nia an de'it, maibé sira hakarak fahe riku-soin ida ne'e ho ema barak, liuliu ho sira ne'ebé seidauk hatene Jezús

L: Basa ha'u haklaken evangeliu karik, ne'e la'ós atu ha'u bele gaba an, basa ha'u simu knaar ida, no ha'u la haklaken karik evangeliu fo direitu mai ha'u atu gaba an, basa knaar ida ne'e saran tiha mai ha'u hodi obriga; no ha'u la haklaken evangeliu karik, susar boot mai ha'u! Ha'u haklaken karik ho laran ksolok, ha'u iha kolen; ho laran todan karik, ha'u simu tiha knaar atu halo. Ne'e duni, ha'u nia kolen ida ne'ebé? Katak wainhira ha'u haklaken, ha'u saran evangeliu hodi la hein ema atu selu, atu ha'u la bele usa ha'u nia direitu iha evangeliu.

G: Iha ita-nia moris, ita hasoru ema barak ne'ebé haklaken Evanjellu: ita-nia aman-inan sira, katekista no zeladora sira, amlulik no irmán sira, ema simples ne'ebé hakarak fahe ninia fiar. Iha momentu ida ne'e ita hakarak agradece ba sira-nia prezensa iha ita-nia moris. Ida-idak bele temi naran sira ne'ebé nia hakarak, kada naran 3 ita hananu refraun: Agradece Na'i Maromak, agradece, maluk eh mai agradece

G: Simu tiha fiar, sai fali responsabilidade ba ita ida-idak atu lori fiar ba ita-nia maluk sira, ba sira ne'ebé seidauk hasoru Jezús ka ba sira ne'ebé hatene ona Nia maibé hadook an husi Nia. Tan ne'e, oras ne'e hodi lori Evanjellu iha prosisaun to'o mapa Timor, ita sei espresa ita-nia hakaran atu tulun iha evangelizasaun rai doben ne'e nian. Maski ita-nia tinan seidauk boot liu, maibé ita bele ona sai evangelizadór ba ita-nia maluk sira. Ita sei hananu Ha'u mak ne'e Na'i, atu fó sasin katak ita prontu atu simu knaar haklaken nian. (halo prosisaun to'o mapa Timor)

L: Mt 5,1-11

G: Pasajen ida ne'e hatudu oinsá sira ne'ebé hakarak tuir Jezús sei moris. Maibé dala barak, ita-nia moris la'o dook husi Jezús nia Liafun, tan ne'e, ita sei husu perdaun ba Nia hodi reza Madre Teresa de Calcutta nia orasaun ida; ita sei hatán Na'i, liberta ha'u husi ha'u-nia an rasik:

1: Na'i, bainhira ha'u fiar katak ha'u-nia fuan nakonu ho domin, hafoin ha'u deskobre katak, loloos, ha'u hadomi ha'u-nia an de'it...

2: Na'i, bainhira ha'u hanoin katak ha'u fó ona buat barak ba ha'u-nia maluk sira, hafoin ha'u deskobre katak ha'u simu barak liu fali...

3: Na'i, bainhira ha'u hanoin katak ha'u kiak, hafoin ha'u deskobre katak ha'u riku ho foti an no laran moras...

1, 2, 3: Na'i, bainhira ami halo konfuzaun entre Reinu Lalehan nian no reinu mundu nian, tulun ami atu hetan ksolok iha Ita de'it.

(hamutuk kaer liman no haleu mapa Timor – se oratorianu barak bele halo lingkaran 2 ka 3)

G: Bainhira ita reza “Halo Ita-nia Reinu to'o mai ami”, ita hanoin ba mundu tomak, maibé, oras ne'e, hodi reza Ami Aman, ita hakarak husu Espiritu nia kbiit atu ita bele kolabora ho Maromak atu haboot Ninia Reinu, nune'e ita hateke ba mapa Timor, fatin iha ne'ebé, iha momentu ida ne'e, Na'i haruka ita atu haklaken Ninia Evanjellu, no ita hananu: **Ami Aman**

G: Na'i, glória no ksolok ba ninia oan sira, sei fó bensa ba ami, hodi akompaña ami iha moris loron-loron nian. AMEN